



STATEN VAN ARUBA

Het Kabinet van de Gouverneur van Aruba
T.a.v. de Gouverneur van Aruba,
Zijne Excellentie de heer Alfonso Boekhoudt
Plaza Henny Eman 3
Oranjestad, Aruba
E-mail: info@kabga.aw

Oranjestad, dia 28 augustus 2023

Referente: Peticion urgente relaciona cu supervision financiero regula pa Ley di Reino

Excelencia,

Cu bista riba e derechonan di Gobernador pa wordo consulta, pa curasha y pa adverti (*'right to be consulted, the right to encourage and the right to warn'*), nos ta dirigi nos mes na Gobernador cu un peticion pa Gobernador conseha gobierno pa procede cu sensatez den cuadro di e desicion cu gobierno mester tuma tocante si lo acepta of no, supervision financiero regula den un Ley di Reino. Cu e carta aki, nos tambe ta distancia nos for di e acusacion cu gobierno di Aruba a haci, cu Hulanda ta exigí un Ley di Reino pa Supervision Financiero Aruba (RAft), pasobra Hulanda supuestamente kier gana placa riba lomba di Aruba door di cobra un porcentahe mas halto di interes cu Hulanda mes ta paga riba e mercado financiero.

Contrario na gobierno y partidonan MEP, AVP y RAIZ, nos ta compronde Hulanda su demanda pa un Ley di Reino como un instrumento pa preveni cu Aruba por frustra supervision financiero den futuro. E demanda aki ta completamente hustifica, en bista cu Parlamento di Aruba den Reunion Publico di 4 september 2018 a acepta un mocion pa elimina supervision financiero regula pa ordenanza nacional (landsverordening). Despues di esaki, Parlamento a acepta un amienda dia 6 juni 2019 pa kita e supervision di parti di gobierno di Reino for di Ley di Supervision Financiero Aruba (LAft). Dicho amienda no a ser presenta na Gobernador pa firma.

Segun nos opinion, tur hende ta compronde cu Hulanda ta completamente dispuesto pa financia e debe di Pandemia. Cu Hulanda ta desea haci esaki conforme e credibilidad financiero di Aruba mes, ta completamente rasonabel. Ademá, Hulanda ta ofrece un interes mas abou como incentivo pa inclui

normanan di bon gobernacion financiero den un instrumento legal cu Aruba no por cambia unilateralmente. Un gobierno serio no por rechaza un oferta asina sin mas.

Tambe ta nos deseo pa trece na atencion di Gobernador cu na Aruba e realizacion ta creciendo cu Hulanda mester hunga un rol importante den e reformanan gubernamental necesario na Aruba. Na fin di cuenta, desde 1986 politica na Aruba a causa cu tanto gobierno como Parlamento a negligisha e administracion financiero gravemente, abusando di fondonan publico. Ademas mandatarionan di Aruba sistematicamente a negligisha e supervision financiero regular di Parlamento. Esey a causa violacion structural di e Ley di Contabilidad y violacion di e terminonan Constitucional pa entrega di presupuesto y cuentanan anual.

Nos tin nos duda si gobierno di Aruba ta negocia di buena fe. Den Reunion Publico numero 25 di Parlamento di Aruba riba 22 augustus 2023, e reunion a ser suspendi indefinidamente despues di e prome termino. Asina a preveni miembronan di oposicion di por a entrega un mocion pa forsa un votacion pro of contra RAft. Den un carta di 25 di augustus 2023 dirigi na Tweede Kamer, Secretario di Estado Van Huffelen ta menciona cu e prome minister di Aruba a informa su persona cu Aruba no ta contra un Ley di Reino. Esaki no ta cuadra cu e declaracionnan di e prome minister den Parlamento riba 22 di augustus 2023, den cual el a admiti cu actualmente di e 21 miembronan di Parlamento, tin 16 contra y solamente 5 na favor di RAft.

IMF ta enfoca riba un *debt anchor* den punto 8 di su 'Kingdom of the Netherlands—Aruba: Staff Concluding Statement of the 2023 Article IV Mission' di 5 juni 2023. RAft actualmente ta e unico instrumento riba mesa cu ta inclui un *debt anchor*. IMF ta describi cu e reformanan financiero cu a tuma luga caba tabata insuficiente. Tambe IMF ta describi con e menasa pa nos sistema di pensioen ta persisti. Segun pronostico ta di spera cu fondo di pensioen general lo mustra deficit den cinco pa seis aña y e reservanan lo ta agota pa mita di 2030.

IMF ta adresa e parti di gastonan, incluso e control di salario, priorisacion nobo di gastonan pa productonan y servicionan, y e realocacion di e gastonan actual pa inversionnan publico cu ta stimula crecimiento. Tur e cosnan aki ta asunto cu e gobierno actual no tabata capas di realisa. Promove mas flexibilidad den mercado di trabou, manera reduccion di costonan pa despedi un trahado y introduccion di un seguro di desempleo, ta recomendacionnan di IMF for di 2018.

Na 2022, un mayoria di Parlamento di Aruba a aproba e presupuesto 2022 cu tabata viola e LAft. Pa e motibo aki CAft a recomenda Consejo di Minister di Reino pa duna un “aanwijzing” na Aruba. Ta te ora gobierno a haya un menasa di un Koninklijk Besluit (KB), gobierno a cambia di rumbo y a cumpli cu e cambionan den presupuesto cu CAft a pidi. Ta obvio cu ta presion for di supervision financiero a haci e surplus den e presupuesto 2023 posibel. Esaki a conduci cu Fitch a subi e calificacion di credito di Aruba pa BB+, pero e deuda di Aruba ta keda, segun e calificacion aki, speculativo y mas abao cu calidad di inversion (*under investment grade*). Ademas ta for di 2018 cu gobierno di Aruba no a presenta un cuenta anual mas. E presupuesto 2023 tabata e prome cu keda presenta na tempo den diescinco aña. Ta mas cu claro cu Parlamento nunca tabatin e capacidad ni e oportunidad pa haci e control financiero necesario y ora nos analisa e sistema politico actual nos mester conclui cu por lo pronto Parlamento tampoco lo ta capaz pa eherce e control financiero necesario.

Pa e motibonan aki nos ta convenci cu e ta totalmente irresponsabel pa rechasa RAft. RAft ta brinda (1) a corto plaso alivio pa e gastonan di interes y (2) a largo plaso un caminda pa bon gobernacion financiero y reduccion di e debe nacional. Ademas RAft ta brinda esaki den un forma cu no por wordo frustra unilateralmente door di Parlamento di Aruba. LAft ta bay vence dia 31 december 2023. E lo ta un gran irresponsabilidad pa cu Pueblo di Aruba si e fecha ey yega, mientras gobierno ainda ta

“negociando” encuanto e RAft. Un postura di gobierno cu no ta demonstra curashi pa tuma desicion ta un indicacion cu tin un resistencia contra bon gobernacion financiero y ta habri porta hancho habri pa falta di seriedad financiero cu tur su consecuencianan negativo.

Nos ta spera cu gobierno ta reflecciona y ta cambia su manera di pensa y cu gobierno ta bay di acuerdo cu supervision financiero hancra den un Ley di Reino prome cu dia 31 di augustus 2023.

Respetuosamente,

Rycond Santos do Nascimento
Miembro independiente di Staten
(e-mail: rycond@parlamento.aw)

Miguel Mansur
Lider di fraccion ACCION 21
(e-mail: miguel.mansur@parlamento.aw)

Cc: Mw. Hanke Bruins Slot, Minister van Binnenlandse Zaken en Koninkrijksrelaties;
Mw. Alexandra van Huffelen, Staatssecretaris Koninkrijksrelaties en Digitalisering;
Mw. Wieke Paulusma, ondervoorzitter Commissie Koninkrijksrelaties Tweede Kamer;
Dhr. Paul Rosenmöller, voorzitter Commissie voor Koninkrijksrelaties Eerste Kamer (KOREL);
Mw. Evelyn Wever-Croes, minister-president van Aruba;
Dhr. Edgard Vrolijk, voorzitter Staten van Aruba.